

Konto dè brakonyé. Cat. 1

Tiénon irè on bouébo déboubenâ. Bin prê, la falyoutse brâna, chovin rèbulya, la mina d'on piti rèvèlyi, kurya kemin na fouêna, chobrâvè din na méjon tsanpithra ou ketsè di j'adrè dou velâdzo. Lè pâ l'èkoula ke le chèkutâvè. I faji rin dè margalère fro kotyè kou bâcha mina, kan cha dona li dejê, in patê binchure : T'â rigenâ po pâ fère tè dèvé, chin chè fâ pâ, dèpatse tè. E che rèmolâvè ôtyè i intindê : chin chè di pâ, lè j'infan dêvon akutâ, lou rèmouâ chin rèpârma. Fô dre ke din chi tin, irè adi la diêra ke faji a charâ lè hyinterè. Falyi tsoulyi, l'avan tyè la lanpa a pétrole ou pêlyo. Kan iran trè ou katro a aprindre a lyère è a karkulâ outoua de la trâbia, falyi chè tyiji, pâ tru chè dèrandyi, chin chin irè la dyêra din le pêlyo, lè tirevunyè, na lichta dè non d'oji è dè kroulyè réjon ke fujâvan. Dè tsanthe ke la dona intindi to du l'othô po ravejâ cha binda.

A l'ôtho è pê lè j'èthrâbio irè lè lintèrnè ke tinyan tittha i vèlyè chonbrè dè l'evê. Ou pêlye dèchu, falyi alâ dremi a novèlyon oubin avui on tro dé tsandêla, l'evê, kan le dzoua l'avi kâlâ. Po pachâ le tin dèvan marinda, irè lè vejîn, hou a Filipe k'aterivan Tyénon.

Irè dou vilye dzouno. I gouarnâvan dutrè banyè din na vilye grandze, po medyi la pathera d'on bintsè ke tinyan avui le bin la Dytthe. Li avi Julon, on apôtre on bokon panthu è barbu, la mouchtatse rochèta ke lichâvè a li barâ le potré. Irè fâchèlyâ, galéjamin gabèri, martyan dè valyinthè ke chalyivan chovin fro di bouênè. Chon frâre Frèdon, pye friolè, avui on tsapi demi kabothâ ke li katiyè la bôla galyâ pyumâlye deji pâ vouéro. I akutâvè achebin chon frâre in pilachin on bokon dè marinda. I trakouâvè in tranpinyin, in trotin pê l'othô, on vilye trintsâbio avui on bokon d'èkoualère agilya kontre la parê. Irè galé dè le vère fère di bubè, inprindre le folyidzo po ruthi di pre dè tère demi pumâ, in lamè rabotâlyè a la groba, ma bin mèhyâlyè dè j'inyon. I agothâvè la choupa in piantin le dê din la pila è din le potè ke binâvè le kâfé dou matin. I akutâvè in rijolin le tètubyo Julon ke menâvè l'andyèta, ke kontâvè ti lè patagon ke li pachâvan pa la pokritse. Frèdon barjakâvè kotyè kou ôtyè po rintseri lè gâlè dè chon frâre.

Ha routha dè Julon irè djamé mudo, djamé a kour avui chè rujè dè brakonyé. N'in ratâvè pâ ouna.

Kan Tyénon l'aviournè dè gournâ lè modzon din la grandze d'amon, i choutâvè vè hou a Filipe. Julon l'avi to gran on konto po li rafonthâ l'invide d'akutâ.

On kou, lé teri on thê dè thin tyintô. (tyintô d'on yâdzo, 50 kilo). Lé chanyi, ma po le tringalâ, li é chalyè la borbalye, lé krouvâlye dèj'on tsiron dè brantsè dè dé. Chu jou tsètyi l'èga è le tonberô. M'a falyu chatenâ lè ravouè. Falyi lè blokâ po tsèrdyi chi monchtro avui l'èga. Le thê, la tittha prêcha din on èthranlyâ tsa lè jou din la tyéche d'on kou dè bori. Apri chin, lé broulyi mon yâdzo avui di fago dè fothi è roupe tanyè a nouthra lodze po le krityi ou palan è l'èkortyi. Kan lé lyu ke falyi kriji la gâfra è chon tsin k'arouvâvan, lé fotu mon jilè du na kouârno ke dépachâvè. Le tsin l'a kudyi achenâ pêr inke, ma la gâfra l'a rakuchi cha londze è l'a pachâ chon tsemin apri on piti bondzoa è on galé kou dè tsapi. Lé pâ pi jou greda.

La pye galéja chè pachâlye amon lè chérnè. L'avé teri on chevreuil. Milon ou Frelè k'irè a la tsathe m'a apêchu. Chè teri pri. Binchure ke l'avé rin dè parmi. Tyè fère ? Milon l'a chalyè on bokon dè karnè po mè dènonhyi. Lè tsahyâ i brakonon achebin, ma ou tin de la tsathe, falyi pâ lou robâ la mindra lèvra. Lé pâ pi jou liji dè m'arandyi avui li ke lé apêchu on Gabelou ke chè terivè pri. Kredyé ! mè chu chintu prê kemin na rata dèje la krâpia dou tsa avui hou dou kêfre ke ténon lè brakonyé. Lé fê a Milon, de na dè charjan-major.

- Chôpyé, di rin, chôva tè inke avô, rido. Mè tsèrdzo dè mè teri di patè. I konyecho le gârda, lè on êmi.

- Ma ta bithe l'a rin dè boton, t'â rin dè pêrmi, l'amanda tè pin ou bè bou nâ.

- Ma na, chôva tè, tè deri to demindze ke vin. Lé na galéja fâcha a li dzulyi, te vari. Chôva tè ! Tè rëfari chin, tin fâ pâ, va lê, fo le kan !

Milon l'a rin konprê a ma ruja. La choutâ avô la chérne avui chon flinge.

- Tyè ke chè pâchè pèr inke la dèmandâ le gârda? Chevreuil pâ botenâ ! Lè tè ke t'â teri ?

- Na na, lè pâ mè, lè li. I chè chòvè pèchke l'a rin dè parmi. I vinyo d'arouvâ. Li é dèmandâ chon non po le dènonhyi è kan vo j'a lyu, la fotu le kan.

Le gârda l'a fi nè yon nè dou, l'a rahyâ avô la chérne in chièvechin chon tsin. Kanbin Milon tavalâvè, le tsin li a akrotyi na mandze è la ratinyè. Irè dza on fiè tro lyin, ou dèchu dou dèrupito dou Chtoutze.

- Ah ! bougre dè routha, t'â bi jou tè chòvâ, ti prè. Balye chi fuji ! di mè ton non ! mothra ton parmi !

- Lé rin fi dè mô, inke mon parmi. Le fuji lè mio. Vouête ! atâtha ! ch'ôcho teri, le kanon cheri adi bèdo. Lè li, lé hô ke l'a rin dè parmi, l'a tyâ on chevreuil.

- Kemin chin ? Portyè tè chòvâ puchke t'i in rêlya ?

- M'a de chòva tè, no volin li fére na fâcha. I prénio to chu mè. Le gârda lè on êmi, lei konycho. Dinche te cheri trantyilo. I volé dyuchtamin li dèmandâ chon non po le dènonhyi.

- Tyinta monètyâ ! Mè fô rè amon po l'akrotyi. Te le konyè ?

- Binchure tyè na ! M'a chinbyâ ache rujâ tyè on renâ, prèchk'on bokon chorchié po mè prindre dè rido kochin.

Te konprin ke lé pâ fi vilyo po tavalâ in amon avui mon chevreuil. Pâ lyin dè vouètanta kilo, pâ ôtyè po kore. Binchure ke le tsin lè j'ou oukchâ kontre mè. Iro dza pri de la deléje dou patheriâ in trin dè dègonhyâ on pneu de la djèpe dou gârda. Kan lè lyu arouvâ le tsin, li é fiè na pèra. La fotu le kan la kuva intrèmi di piôtè. Te vè Tyénon, lè jou na bouna ha inke. Lè pâ le gârda ke chè gabâ d'ithre jou ingeujâ. Milon n'in rijolè ti lè kou ke le vèlyo. Li é palyi kotyè kou on vèro on lyâdzo la tsathe pachâlye. Te konprin, i brakonè achebin.

Binchure k'irè pâ la darire a Julon. Tyintè fariboulè. Chi gabèri lè chavi toté, n'in ratâvè pâ ouna. L'a tyâ di renâ chin lè ratâ a thinkanta mètre, atan kan chan dè pointe tyè dè hyan. Vouête ma garôda ! On tachon ke lé biochi m'a rahyâ kontre, m'a dèkucheri ha garôda, pâ nàvoua, ma dè kouè. Ma falyu le chèkàre po li teri on kou dè pi, le fére a vanâ dèvan dè le fourni avui na novala dètsèrdze dè dradia.

- Ma, i krèlyé k'irè le tsin dou Benethon ke t'a dèkucheri ta garôda li a de ha routha dè Tyénon, kontin d'avi trovâ la mèche po broulyi chon konto.

- Vouête ma garôda ! Li a duvè lanirè. Ha lè dou tachon, la pitita lè ha dou tsin. Na mâre dè tsin. On dèvelné Dzojon dou Benethon l'a oubyâ dè kotâ le pèhyè dè cha tséna. Irè rintrâ on fiè tro chou du la vinta dou lathi. No j'ityivan lè renâ po lè teri ou chtonpo. L'a falyu ke chon tsin chintichè l'itse, ke fachè tyè na mouâcha d'on galé mochi dè tsa.

- Portyè dè tsa ?

- Pèchke lè tsa chè medzon pâ intrè là. Dinche li a tyè lè renâ ke prènyon l'itse. On dèvelné, l'itse lè jou lêvi. No j'an tsèrdyi le chtonpo. L'afère l'a dzulyè, ma lè ha mâre dè tsin ke l'a yètâ l'itse. Lè jou poutamin biochi. Kan chu jou po le fourni, lè li ke l'a èprovâ dè mè mouâdre.

- I ché, vo j'a falyu palyi on novi tsin.

- Ha ke te châ pâ, lè ke chu j'ou fotre le tsin avô la rupa dè Pènihyé. Dzojon m'a dèmandâ chon boralè, l'avi le non dou tsin piakâ dèchu avui chon mimerô dè batichtéro. M'a falyu rèkore avô pè Pènihyé. Li avi dza dou renâ d'avron la karkache. Mouja ! d'on kou dè fuji a dradia, lè j'é ètharbalâ ti dou. Rintyè avui la pi dou mindro, lé pu palyi le tsin.

- Ha adon la chavé pâ.

Kan le piti Frèdon l'a chalyè chè pre dè tèra bin ruthi. Tyénon, prèchke intsèrèlyi pè hou konto, chè lèvâ krache.

- Kredyé ! mè fô mè dèpatyi dè rintrâ. Vèr no, l'aron dzaourné la choupa. Ebin bouna né è boun'apèti

Tyénon ruminâvè ti hou konto. Di vouêrbè, li chinbyâvè prà k'iran grobamin inbortolyi, ke lè valynthè a Julon iran inrubanâlyè dè dzanlyè on bokon krolyètè, ma kan mimo, l'invide le tenalyivè, le chèkutâvè.

On dzoa, lè jou inprontâ le fuji a dradia vè Kechto de la Pêra grise, on vèvo ke vèkechê cholè, ke pachâvè le tin a dzulyi i kârtè deché delé. I kurtilyivè on bokon dè kurti po cha choupa è po kouêre avui la tsanbèta. I vouardâvè onko na tyivra po chon lathi.

L'a jejou brakonâ, ma li a dza kotyè j'an ke la pouère di j'amandè l'a vouèri.

Li achebin, ma li a grantenè, l'a ingeujâ on gabelou.

L'avi tyâ on tsamo. Binchure ke le kou dè fuji l'a rèvèlyi le gârda. Chtiche l'a fê nè on nè dou.

L'a prè che n'oto è to tsô amon. Dè tsanthe ke li falyi fère on tro a pi du le tsemin tantyè a cha dzébe. Kechto chè vèlyivè. La de a cha fèna.

- Va rido tè fotre ou lyi ! Kechto l'a tatyi le linhyu avui na gota dè chan, li a betâ le tsamô chu le vintro. Cha fèna l'a to konprè. Kan le gârda lè arouvâ, Kechto chalyivè de na drôla dè tourdze in tsebrôtin. Li di tyè dutrè mo :

- Chu galyâ prèchâ, ma fèna lè in kutse, mè fô apri la bouna fèna.

- Fâ rin, lé tyè fôta dè fère on toua pèr inke. Lé olyu teri, t'i prou chure in kouja.

- Bon bon ! va ou pèlyo, te vèri dza che dio di dzanlyè.

In èfè, la fèna irè ou lyi, tsô vouêrbè i dzemâvè in dejin a che n'omo dè chè dèpatyi.

- I va, i va ! li a de le gârda, i vèlyo ke lè pâ tan ma piathe dè vo dèthorbâ vouè, a rèvère.

-I vo chyèvo to tsô, mè chinbyè ke l'afère i prichè li a de Kechto.

L'afère l'aournè dinche, ma kotyè tin apri le gabelou li a demandâ che lè jou on bouébo oubin na filyèta.

Kechto chè pâ krèvâ dè rire, ma to lè jou konprè. Lè pràvè iran fotyè, tru vilyè. To l'avi binournè. Le brakonyè chè prou apèchu ke le gabelou l'a konprè cha routha d'indzeniche. Pè pouère d'on rèvindzo, la chintu ke li falyi dzoure. Irè vèlyi pye chovin tyè a chon toua. Lè po chin ke chon fuji lè pâ rè jou dèkrotyi dè chon hyou.

Tyénon l'a pu rintrâ avui cha dzihia, Lè jou i kartouchè vè Morâ dè Bulo.

Chon piti frârè l'a roubatâ na ràvoua dè vèlo avô na kothèta. Irè garnya de na chuba dè papê.

Le kou dè dradya l'a pâ rintyè pèrhyi le papê, le pneu l'a achebin pèrdu chon chohyo.

Chon chènïa rijolâvè. Chavi prà ke po vèlyi di renâ, falyi ke fachè bi dè lena, ke la nè krouvichè le tarin. Moujâvè prà ke la pahyinthe l'arè vuto prè le dèchu po vouèri chon bouébo.

Lè cha dona ke l'a betâ le bâthon din la ràvoua. Kan l'a lyu chon bouébo manèlyi chon fuji in le verin n'inpouârtè kemin, li a de.

- Che tè vèlyo rè on kou brakâ chi kanon kontre kôkon, ke chi tsêrdyi ou pâ, te le vèri pâ rè.

Bon ! la lena l'avi rinforhyi lè j'âlè dè cha korba, la bije èbudalâvè a fère di gonhyè. La yè, kemin oun'onbrala grant'ourâlye èthindi cha têla motsatâlye d'èthèlè. Tyénon l'a inmandyi lè chôrké a kol drê dè chon chènïa, chè infachotâ dè dyija, lè modâ avui chon totyè dè vèlu è binchure, cha dzihya a drobio kanon tsêrdya dè kartouchè a dradya.

Vo dio ! lè jou chè pouchtâ dèvan le grô tsâno a la ruva de la dzorèta. L'avi lyu di pachâlyè dè renâ to pri. Oun'âra, onkor'on ourèta. Rin ! pâ na kuva. Poourni, gurlin dè frê, le fuji li è tsejè di man. Falyi rintrâ ?

Tèthu kemin on mulè, Tyénon l'a pâ pèrdu korâdzô. Ouna vèlyo, duvè, ché pâ vouéro, pâ pi on tsa, na fouèna, on tachon li an mothrà le mindro moua, la pye kroulye kuva. Pâ pire on loutsèrou ke rôdè a tsartyi on maji

Hou j'ârè a vèlyi chon pyènè dè j'èbèloudâlyè. Kan la lena dzulyè a la bâra avui lè nyolè, to i chonbrèlyè, le tin vin âlyo, la lena pêcha. Lè brantsè tralenon, la lyuva lè afôtya pa la niola ke mothrè tyè kotyè j'èthèlè. Fâ pâ bon po lè brakonyè.

A fouârthe dè vouityi, i chinbyè ke lè piti bochon i budzon, ke tsandzon dè piathe. Lè dêrbounèrè vo fan chungyo. La fredenâlye de la dzà, na chihyâlye d'oji, lè brantsètè troupâlyè

pa lè bèthètè fan di krejenâlye ke chorèprênnon. Lè j'arè vinyon grantè. On intin chenâ lè kà è lè j'arè din dutrè mohyi. Trivô, Pon na vela, Rochin, mimamin Epindè è Farvanyi vo rapalon, djêmé in mimo tin, la dourâlye de la vèlyà.

Fô pâ kontâ lè vèlyè ke vo fan rintrâ a vudyô. Lè pâ tyachon dè vouityi lè j'èthèlè ke chon ache vivè tyè la bije.

On dzoa, hou dou Benethon l'an menâ dutrè yodyè dè fèmmè ou dèchu d'on polyè. Tyénnon n'in da profitâ po chè pouchtâ dèje na dâlye a bouna lyuva po teri.

L'a pâ mankâ, to chè pachâ dè vire tè delé. Tyénnon l'a rin lyu chalyi dou botsalè. La chorèprêcha lè jou po lè dou. On renâ l'a choutâ chu le bokon dè kourtena. Lè dou chè chon lyu in mimo tin. Le renâ choutâvè dza in arè po chè chôvâ kan le kou dè dradyâ lè modâ. La chorèprêcha lè jou pye viva tyè la rèbuthâlye dou fuji è la pi d'oulye le l'a chèko Tyénnon. Ratâ, kredyé, rin mé dè renâ ! L'a rè armâ l'ôtro canon, ma li a lyu tyè nyuba. Pâ la mindra kuva ke vanâvè. Ha routha l'a chure profitâ de l'abafâlye dou brakonyé po chè touâdre. Pouro Tyénnon ! chobrâvè tyè a rintrâ. Tyinta tsanthe in pachin. Le renâ terivè nè pi nè kuva delé de chi tètson dè fèmmè. La dradya lè jou pye rido tyè le chô dou renâ.

L'a fi bi pê la méjon. Chènya è dona iran pâ dremi. Lè vouè dè dzoulyo dè Tyénnon l'an rèvèlyi chon frârè, mimamin chè duvè chèrè. La vèlyà lè jou druva. Falyi kontâ l'aventura, koupyenâ chi renâ, anyatâ cha bala kuva, le pindre a la lodze tantyè ou matin.

Pardyi, le lindèman, falyi léva vè hou a Filipe por èkortyi chi pèlà. Chti kou, lè Tyénnon ke l'avi ôtyè a kontâ. Félon bichkâvè on bokon dè falyi dre k'irè pâ on atson por èkortyi lè bèthètè.

L'a molâ chon kuti, i chinbyâvè la mindra gôtso in èkortsin hou piôtè, chuto la kuva ke l'a pâ chu dèforâ. Tyénnon moujâvè chin oujâ dre ke n'in d'a chure pâ èkortyi thinkanta.

L'a betâ a chètyi la pi dutrè dzoa chu on lan è, fyè kemin Artagan, lè modâ in vèlo tantyè a Bulô, vè Mourleva. Trinta fran ! na fortèna po chi bouébo.

Ma la lèna l'avi tsandyi cha kolâ kontre na fèna korba ke terivè chu le nè. Falyi atindre na novala lenèjon por èprovâ d'alâ vèlyi. L'a pâ jou mèche on pâre dè chenannè. La jou la tsanthe dè fotre bâ on chèkon renâ, ma irè dza rapâ. Hou routhè chon pi tyè lè matou ou mi dè fèvrè. I kortijon, chè vunyon, lè pê di hyan chè trèjon. La pi fâ pâ mé invide. N'in d'a rèchu tyè dyi fran.

To chin l'a fournè pê tsère in èkouéche dutrè j'an pye tâ.

On dzoa, cha dona lè arouvâlye tot'èkafoudia. Dèvan ke Tyénnon dyéchè ôtyè, cha dona li fâ :

- Tè ti pâ gabâ d'avi teri on chevreuil chti matin. Vouète chi tsevri. Irè pâ cholè. Lé trovâ in alin i tsanpinyon. Irè dèkouthè cha dona, na bala tyivra k'agonijâvè dèje na dâlye dou polyè. I piorâvè. Lé djêmé yu ôtyè dinche. Chin m'a èthrin tan trichtamin le kà ke lé achebin piorâ in èchulyin lè lègremè ke kolâvan avui mon fourdâ. Chon piti irè to pri. L'a pâ èprovâ dè chè chôvâ, chè léchi akrotyi, por achenâ le chon dou fourdâ. Li rapalâvè cha dona. Chavé pâ bin tyè fère. Le léchi inke oubin le prindre por èprovâ dè le chôvâ. Ha poura bithe l'a fi na drôla dè dzemotalye. L'a béji l'ërba in kotin lè j'yè. Irè fotya.

Tyénon k'akutâvè chin rin dre la achebin èkrajâ na lârma in dejin :

- Tè dzouro ke lè pâ mè ke lé teri. A chta chajon, lè tsahyâ è lè brakonyé ke l'an dou kà tiron pâ lè chevreuil. I chan kan lè la chajon di tyivrè ke fan lè piti. Kan lè jou vouityi pri de la dâlye dou polyè, la tyivra irè lavi.

- Lé pâ fôta dè moujâ koué l'a fi chin. Prou chure on novi kou a Julon. Dè chi inke, i àjèrè pâ chè gabâ.

Pouro tsevri, ta dona l'a tyithâ la dâlye dou botsalè. No volin to fère po tè chôvâ.

Lè jou keri on bokon dè lathi dè tyivra vè Kechto. L'a pâ jou fôta dè poupalè po li aprindre a tourdyi. Le tsevri vinyè adi pye dâmâ, adi pye galé. Li a nyâ on lyètô brodâ dou ruban rodzo outoua dou gargachon po le balyi a konyèthre. I trotâvè outoua de la méjon, chè gouarnâvè d'ërba. I korchè adi pye lyin ma i rèvinyè to-t'avi achenâ le fourdâ ke l'a èchulyè lè lègremè

dè cha dona. On dzoa, ché pâ che l'a apachu na chéra a la ruva de la dzà. No l'an pâ rè lyu. On tsahyà l'a kontâ avi apêchu on chevreuil avui on kolyé outoua dou kou. Irè prou chure le tsevri a Tyénon.

Poru ke lè tsahyà, chuto lè brakonyé le terichan pâ.

Tyénon l'a pâ pu chè tsoulyi dè moujâ a to chin, d'avi lègremâ in vèlyin piorâ cha dona. L'a rindu chon fuji è l'a dzourâ a cha dona k'irè vouêri dè brakonâ.

Moujâdè : irè ma dona è le brakonyé irè mè.

Tyénon